



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tir_yimiyim

yt tir yimiyim

TAPAK 8



Bangladesh court-i Sheikh Hasina aputsü bushir

ISSF World Cup: Vivaan-i silver & Anant-i bronze medal angu



VOL. XXII ISSUE NO. 09 (ADOK 09) DIMAPUR ROGONÜ (FRIDAY) MONGPUTENI (OCTOBER) 18, 2024 ₹ 5.00

Mpox atema SHEOCC züngsem senden amen

Dimapur, Mongputeni/Oct. 17 (TYO): Commissioner & Secretary to the Government of Nagaland, Department of Health & Family Welfare, Anoop Khinchi, IAS ajanga Mpox (Monkey pox) dak sendakba nung Department indang Public Health Preparedness asadangtsü atema State Health Emergency Operation Centre Committee züngsemtem den senden ka October 17, 2024 nü Kohima nung mena liasü.

Emergency of International Concern (PHEIC) ta World Health Organisation (WHO) ajanga sangdonga lir.

Iba senden nung department ketdangtsür temi Commissioner & Secretary nem Department of Health & Family Welfare, Nagaland indang public health preparedness osang agüja liasü.

Pai state tesem ajungalen Health Units ajunga nung Health Care Workers dang renemshia alitsü aser tekeratiba nung Mpox putettsü asoshi jelia mera balala agia alitsü ayongzüka liasü.

Mpox ya Public Health

Terenlok asoshi lenmang tesendaktep alitsüla: Angh La Ganesan



Nagaland Angh La Ganesan-i October 17, 2024 nü Mon semdangba mapang district ketdangtsür temi pa agizükba noksa nung angur.

Dimapur, Mongputeni/Oct. 17 (TYO): Nagaland Angh La Ganesan-i October 17, 2024 nü Mon District semdanga department balala aser CSOs tem den Deputy Commissioner, Mon indang Conference Hall nung senden ka mena liasü.

Angh meina Rajesh Soundararajan, IAS, Commissioner & Secretary to the Governor oa liasü.

Angh-i iba senden nung jembidang Mon district nung sobaliba tajung aliba agi tenük asüngba ashi aser Konyak nungger ya Nagaland asoshi tejak tentetba kin ka lir, ta ashi.

Süng amshia noksa balala chitetba, tebour tajung Aoleang benjong aser tesüiba otsütem ya putu sa putu mesamai amshir, ta pai ashi.

Pai nüburtem dang lanu putu asoshi sobaliba tajung wazüka ayutsü ayongzüka aser kakat reju nung cultural day tali ayongzüksü aser sobaliba tera meraksai tajungba kuma amshitsü ajungshia liasü.

Healthcare mapa inyaker temi timtem balala ajurudang tasü ita nokdakba atema pai pelaba lemsatep aser temang anema aliba nung tera ayangbaji kanga tongtipang lir, ta Angh La Ganesan-i ashi.

Dimapur, Mongputeni/Oct. 17 (TYO): State nung National Highway dak sendakba ken o balala jembitsü atema Deputy Chief Minister, Minister In charge of Planning & Transformation and National Highway, T.R. Zeliang lenisüba kübok October 16, 2024 nü Nagaland Civil Secretariat Conference Hall, Kohima nung senden ka mena liasü.

Iba senden ya State nung NH projects balala atema Ministry of Road Transport & National Highway-i ajitetba agüja aliba jembitsü nükjidong nung ayongzüka. Iba atema Union Minister Nitin Gadkari-i October 21-22, 2024 anogotem New Delhi nung senden ka ayongzüka lir.

Kasa mapang 25th Hornbill Festival atema road sector nung mapa inyakba indang September 11, 2024 nü senden nung jembiba tanaben lepa reprangshia liasü.

Deputy CM Zeliang-i benjong mapang, talisa NH-29 nung gari timtem makai senzütettsü

Sorkari healthcare dak sendakba scheme balala sangdonga aliba indang jembidang Angh-i department dang nüburtem kishiziung tonga item scheme bener oa ajangzükdaktsüsü ayongzüka liasü.

Alima nung TB samadaktsüsü asoshi nükjidong yua aliba dang küm pongu agi jelia 2025 tashinung TB samadaktsüsü nükjidong nung tenzüka Pradhan Mantri TB Mukta Bharat Abhiyan indang pai lemsatep aser iba indang awareness tali agütsüsü ayongzüka liasü.

State PWD aser NHIDCL kübok lenmang yangluba indang jembidang, yakta state nung arütsülen aliba tesemtem lenmang tajung agi sendaktepsü, kechiaser terenlok asoshi lenmang tesendaktep ya tongtipangtiba, ta La Ganesan-i ashi.

Lenmang ya shishilambatsü atema tamendak dak, shisaliok asoshi lenmang lir, aser ibaji ajanga kati ka den sendakteper, anungji lenmang tajung yanglutsü kanga tongtipang lir, ta pai ashi.

Pai lenir, educator tem dang kakat reju tajungba kumdaktsüsü asoshi bendanga agütsür shisatsü bushitsü, kakatshirtem ajungmesotsü aser shisaliok ajanga Mon district tarutsü jenjang alangzüksü ayongzüka.

tongtipang lir ta ashi, kechiaser tourist aser bendang lima nungi tongtipang nisungtem NH-29 nungya jajatsü lir.

Highway tesem kar nung NHIDCL aser NH (NPWD) ajanga mapang shidak nung lenmang renemtsü ta September 11 nü senden nung nangzüka indang benoka jembia liasü.

Iba mapang tzunglu tanen makai aruba ajanga maparen terenlok nung tetsükdaktsü ajurur, ta mapa inyaker temi ashi.

Ajisüaka Deputy Chief Minister aser Commissioner & Secretary, Works and Housing ajanga anogo atsülangtsü tamakoktsü aser magizüksü, kechiaser November ita tiyonglen nungibo tourist aser tongtipang nisungtem arutsü imlar, ta shia liasü.

Anungji NHIDCL aser NH (NPWD) dang October ita tatem tashinung maparen ajak tembanga inyaktsü totuyuba agütsü.

State nung 25th Hornbill Festival amungtsü renemshiba mapang lir,

State nung temesepba mozü amshiba tebilemstsü indang lemsatepdang, iba yagi tamshir kisüing takum jenjang samatsür masü saka kibong aser lokti ajunga raksatsür, ta ashi.

Pai civil society aser ozüing amshirtem dang temesepba mozü anema nokdaktsü aser state telungi temesepba mozü bener aitba anendaktsüsü ajungshia liasü.

Lokti tentet balalai state aser centre den teka amteper tarutsü tia yanglutsü asoshi inyaktsüla, ta Angh-i ashi.

Nagaland Angh ya Mon helipad nung ketdangtsür temi agizük aser Walo Guest House nung Guard of Honour agüja liasü.

Senden nung Deputy Commissioner Mon, Ajit Kumar Verma, IAS menden liasü, kong Konyak Union ajanga Frontier Nagaland Territory atema tezüluba ka agütsü aser Konyak students' Union ajanga district nung lenmang majungba, medical aser educational facilities jenjang mejungi aliba lemsatepa liasü.

Iba senden nung NHIDCL, PWD (R&B), CMO Mon, PWD (R&B) Aboi, EE PHED, DEO Mon aser Project Director, RD, Mon ajanga department inyangshia osang tongmelang agi lemsatepa liasü.

kong state telungzüka aser dangalen nungi tourist jenti arutsü imlar, anungji senzüsemponger tem lenmang nung tetsükdaktsü majurui Naga Heritage Village atongtsüla, ta Dy. CM-i ashi.

Kasa mapang Works & Housing Department ajanga mapa inyakba department dang pei jurisdiction nung lenmang yanglushiba maparen tekeraba nung inyaktsü nenshia tezüluba nung agütsü.

Iba senden nung Land Act indang ken o-a jembia liasü, kechiaser Land Compensation ken o metembang aliba ajanga NH-202 atema senotsü sanction asüba Ministry nung anendaka lir.

Iba dak sendakba nung Commissioner & Secretary Land Revenue dang NH-202 ajangba district tem nung ali jenjang atettsü totuyuba agütsü. State sorkari agizükba sülen ali jenjang ya DPR nung inoktsü aser Ministry dangi tekeraba nung project sanction südaktsüsü atema yoktsü, ta ashi.

NSDMA ajanga October 24 nü 7th annual NEPEX agitsü



Secretariat Conference Hall, Kohima nung osangbener den jempidang tangokba noksa nung angur.

Kohima, Mongputeni/Oct. 17 (TYO): Nagaland State Disaster Management Authority (NSDMA), Home Department ajanga October 24, 2024 nü 7th annual Nagaland Emergency Preparedness Exercise (NEPEX) agitsü.

ajurutsüsa lir, ta pai ashi. NEPEX 2024 mapang NSDMA ajanga disaster response capabilities asadangtsü, terenemshiba nung akangshitsü, awareness agütsüsü, Emergency Support Functions (ESF) atema capacity building dak rangloksü aser lenla ajak nung Standard Operating Procedures amshitsü, ta ashi.

Iba exercise ajanga sorkar indang departments, civil society organisations aser nüburtem tsüingta tesendaktep tali akangshitsü imlar, ta Ruangmai-i ashi.

NEPEX 2024 nungya sorkar ketdangtsür, department, agency den CSOs aser nüburtem shilem agitsü, ta pai ashi.

Iba mapang Indian Army, National Disaster Management Authority (NDMA), aser danga State Disaster Management Authorities (SDMAs) nungi observers jaoka lir, ta Joint CEO ajanga ashi.

Osangbener temi state nung urban area nung jurila ki o jen junga meyangluba atema Building Bye-law ali mali ta asüngdang dang, NSDMA ajanga stakeholders capacity development program agidang Urban Local Bodies nungi lenirtem dang tekeratiba nung Building Bye-laws tajung ka renemtsü atema inyaker ta metetdaktsüogo, ta ashi.

NSDMA ajangasa October 22, 2024 nü DDMA chairmen, line department ketdangtsür (AHOds/HoDs) aser NDRF/SDRF/paramilitary/IAG züngsemtem den anepdang 10:00 ako nungi Table Top Exercise (TTEEx) agitsü, ta metetdaktsü.

Brehostibarnü Secretariat Conference Hall, Kohima nung osangbener senden ka nung jembidang Joint Chief Executive Officer, NSDMA, Johnny Raungmai-i ashiba agi, 7th NEPEX ya October 24, 2024 anepdang 9:30 ako nungi tenzüka state yimtiba aser district headquarters ajanga nung agitsü.

NEPEX ya alimar lendong balala ajuruba mapang state dak tashi aliba tendangtsü asoshi mock drill dang lir aser menoknok tesashi anoker ama iba sentong ya agitsü, ta pai ashi.

State yimtiba aser district headquarters densema tongtipang tesem ajunga nung anepdang 9:30 ako nung emergency siren ola agüja NEPEX 2024 ya tenzüksü, ta Ruangmai-i ashi.

Iba sentong nung school, offices aser danga institutions temi shilem agia minute ana 'Drop, cover and Hold' drill agitsü aser iba sülen jelia shimteta aliba tesemtem nung nüburtem anidentsü, aser 'response and recovery' atema Incident Response System (IRS) amshitsü, ta pai metetdaktsü.

Iba atema pai nüburtem dang maoksa teptsü, saka ajaki shilem agitsü aser ketdangtsür den amalitep akatsü ayongzüka.

Nagaland ya Seismic Zone V nung lir aser menoknok, alinen, ajungben tzümetsüing, yipru aser morok mi ama mela-mela

Nagaland nungi osangbenertemi Mumbai aser AURIC semdang



Aurangabad Industrial City (AURIC) indang model noksa nung angur.

Dimapur, Mongputeni/October 17 (TYO): Nagaland nungi osangbenertem team ka Mumbai aser Aurangabad Industrial City (AURIC) semdangi anir oa liasü. AURIC ya India indang mezüingbuba green field industrial smart city rongnung ka lir koba Maharashtra kübok Aurangabad tezülen ali acre 10,000 nung amenoka lir.

Iba tour ya Press Information Bureau (PIB), Kohima-i ayongzük, koba employment atema maongka agüja yimitem kanga kara renloka aoba sayutsü nükjidong nung ayongzükogo, koba state nungi ajizüka benshitetsü.

AURIC ketdangsürtemi ashiba agi, jila tasenba nung office, residences, hotels, retail, hospitals, schools, parks,

entertainment hubs aser tanga utilities tem alitsü.

Nagaland sorkari state nung arua sen intoktsü asoshi investor tem atsüa arutsü atema jenjang agidar. Ajisüaka industry terenlok asoshi ali agütsüba aser tanga tenüngdakba infrastructure tem atema atsüanem akatsü kanga nüngdaker.

Kasa mapang nung state-i, industrial hub tem renloka aotsü atema tesemtem shimtetsü, kechiyong state ya north east India aser ASEAN linüktem ajurutebpa tesem ka kümteetsü. Nagaland ya India aser kidanger linüktem tesendaktep asoshi shishilemba aser industrial kikümtong ka kümteetsü.

AURIC terenlok aser inyakyim ya Aurangabad Industrial Township Limited

(AITL)-i achaayanger, koba Maharashtra Industrial Development Corporation (MIDC) aser National Industrial Corridor Development Corporation (NICDC) na tsüngda Special Purpose Vehicle (SPV) ka lir.

Ketdangsürtemi ashiba agi, AURIC ya smart, green, self sustaining aser eco-friendly asütsü atema designe süa yangluba lir. AURIC ya Aurangabad International Airport nungi minute 10 dang pilar lir aser iba tesem ya India nung tanga tongtibang yimitem den kanga junga sendaktepa lir.

Iba tour ya PIB, Assistant Director Soni Kumar Singh aser Raushan Kumar nati anir ao aser PIB, Mumbai nungi ketdangsürtemi teyari agüja liasü.

India Mobile Congress 2024 nung Nagaland-i shilem tajung agi



Dimapur, Mongputeni/Oct. 17 (TYO): New Delhi nung aliba Pragati Maidan nung October 15, 2024 nü India Mobile Congress (IMC) 2024 alidang Nagaland nungi Advisor, Information Technology & Communication, Economics & Statistics, Evaluation Government of Nagaland, H. Sethrongkhyu Sangtam-i aniba team kati state tesem ajungalen connectivity tsütsü terenlok aliba indang osang agüja liasü.

Iba sentong ya Department of Telecommunications (DoT), Government of India ajanga Cellular Operators Association of India (COAI) den lungjemer ayongzük, kong company 250 dak tema aser startups 400 shi dena Asia nung telecom aser digital technology sentong tulutiba rongnung ka liasü.

H. Sethrongkhyu Sangtam-i Nagaland nung 4G Saturation Project kübok maparen balala nung terenlok aliba indang lemsatep, koba ajanga state

nung meta talangtiba nung aliba tesem nunga telecom tesendaktep agütsür.

State nung tekong-tenem ajanga tayongzükba balala ajuruba koktettsü asoshi nüburtemi yaritebpa atema pai pelaba lemsatepa liasü.

Item mapa inyakdang tongtipangtibaji Right of Way (RoW) policy amendment ya liasü, koba ajanga telecommunications infrastructure tetsükdak makai amenoka amshiteter.

State nung connectivity tsütsü terenlok aliba ajanga 5G technology amshi tenzükogo, ta Advisor Sangtam-i ashi.

Pai sorkar aser nüburtem tsüngta teka amteper inyakba indang jembidang, telecom infrastructure tekeraba nung amenoktsü atema yimtsüng 277 nung ali angati agütsü, ta ashi.

Tanüngba yimtsüngtem ya 4G Saturation Project kübok connectivity agütsütsü lir, anungji India indang digital revolution nung Nagaland ya

tongti shilem agir ka akumtsü aser Atmanirbhar Bharat mangdang den lirumedema akumtsü, ta ashi.

Nagaland indang telecom connectivity tajungba kuma melenshitsü atema tanen makai yariba asoshi Sangtam-i ato kilonser, union minister aser Department of Telecommunications dang pelaba lemsatepa liasü.

IMC 2024 nung Nagaland nungi Commissioner & Secretary, IT&C, Mohammed Ali Shihab (IAS); Director IT&C, Er. Sabou Yashu; Joint Director IT&C, Er. Chura Katiry; Program Officer IT&C, Vizosielie Semou aser PA to the Advisor IT&C, Athrili Anar nungertem oa aden.

Iba sentong nung Union Minister Jyotiraditya M. Scindia, Minister of State Dr. Chandra Sekhar Pemmasani, Ministry of Communications, Government of India den state balala nungi Chief Ministers, IT Ministers aser ketdangsürtem dena liasü.

Chumoukedima nung PMV on boarding program agiogo

Dimapur, Mongputeni/October 17 (TYO): Pradhan Mantri Vishwakarma (PMV) on boarding program October 17 nü DPDB Hall DC office, Chumoukedima nung agiogo.

Advisor Industries & Commerce, Hekani Jakhalu-i, iba scheme indang nükjidong metetdaksü aser Dimapur, Chumoukedima aser Niuland nungi lokti lenirtem dang temsüa aliba beneficiaries tem anir arutsü mepeshia liasü.

Jakhalu-isa, lai district asem nung ya iba scheme achaayangdar ta shia lenirtem dang ken o dak sendaka aliba department-i finished products tem atema shishilembadak anepalutsüogo, ta ashi.

PMV ya central sector scheme ka lir, koba Ato Kilonseri September 17 nü amenoktsüogo, aser iba ya pei teka aser hadir amshia mapa inyakba artisans aser craftsmen tem nem teyari

agütsütsü asoshi lir.

Iba scheme nükjidongji item nisungtem sempet aser libaliri ajungkettsütsü atema training, technology, credit aser shishilembadak den sendaktepsütsüba amala teyari balala agütsütsü asoshi lir.

Iba scheme yagi Carpenter, Boat maker, Armourer, Blacksmith, Hammer and tool kit maker, Locksmith, Sculpture (Idol, stone craver, stone breaker), Goldsmith, Potter, Cobbler, Masons, Basket/mat/broom/ coir weaver, Doll & toy maker, Barber, Garland maker, washerman, tailor aser Fishing net maker amala artisans aser craftsmen tem ayimjemer.

Sentong nung Director Industry & Commerce, Tokugha Achumi-i okila jemi aser Consultant PM Vishwakarma Vithule Krichena-i PMV scheme indang metetdakja liasü.

Tening nung aluyimertem nem training agütsü

Peren, Mongputeni/October 17 (TYO): Aluyimertem nem organic standards sülen anidakdaksütsü, kuli kaket agizükdaksütsü aser shishilembadak tajangzük kadaksütsü atema Department of Agriculture Nagaland-i, Peren District kübok Tening Block nung anogo pezü atema aluyimba dak sendakba nung training sentong ka ayongzüka katsüogo.

Iba training ya October 7 nungi 10 tashi Mission Organic Value Chain Development North Eastern Region (MOVCDNER) Phase 4 kübok Department of Agriculture, Nagaland aser Green Caravan na longjemer agiogo.

Training yagi Nsong, Nzau, Tepun, Azailong, Nchangram, aser Old Tesen ta yimtsüng trok ayimjema liasü. Training nung aluyimer 500 dak temai shilem agiogo.

Peren District Sub-Divisional Agriculture Officer (SDAO) Samsangheile Nchang-ia iba training sentong nung shilem agi, aser training nung shilem agirtem dang tanü aluyimba nung organic farming koda tongtibang iba indang lemsatep. Laisa, iba ajanga tzümpung nung tajangzük aser aluyimertem rongsenketzung nung renloka aotsü asoshi lenmang sadema lapoka aliba indang lemsatepa liasü.

SDAO-isa, aluyimertem nem teyari agütsütsü aser lenmang sayutsü atema Department of Agriculture bendanga agütsür aliba nenshia metetdakja liasü.

Maneni lai, aluyimertem nem tenüngdakba training aser jenjang aketba organic metsüjangnatsü, bio-pesticides, aser organic certification inyakyim ama resource tem agütsütsü department-i

inyaksangshidar ta ashi. Lai, sorkar, aluyimba nung mongintem aser local team longjemer inyaksü koda tongtibang iba indang lemsatepa liasü.

Maneni SDAO Nchang-i, shishilembadak balala den sendaktepsüba, aluyimertem aser talirtem sendaktepsüba nung department shilem indang lemsatep. Lai, aluyimertem dang organic farming ajungkettsü atema sorkari scheme balala agütsüba maongka agütsü ajungshiba den organic sector nung parnok renloka aotsü atema department-i maneni technical aser senotsü teyari agütsütsü, ta ashi.

Anogo pezü training agiba mapang technical session ya National Program for Organic Production (NPOP) guidelines dak rangloker agia liasü.

Training mapang aluyimertem tem nem organic certification, community level nung management of Internal Control Systems (ICS) aser organic chiyongtsütem atema shishilembadak tesendaktep, ta onük asem dak ajemdaker tangazükba agüja liasü.

Nsong, Nzau, Tepun, Azailong, Nchangram, aser Old Tesen nungi aluyimertem organic standards, gain certification sülen anidaktsü aser Tening Organic Producer Company Ltd ajanga tajangzük agidaktsütsü nükjidong nung item session tem ya agiogo.

Yimtsüng trok nungi aluyimertem iba training sentong nung kanga jangrabangra shilem agiogo.

Maneni Agriculture Department aser Green Caravan na longjemer tanga disgrict tem nunga training session balala ayongzüka agütsü sentong lir.

Nayab Singh Saini-i tanabenbuba Haryana CM tenangzükba agi



October 17, 2024 nü Panchkula nung Nayab Singh Saini-i Haryana Chief Minister inyaktüsü asoshi tenangzükba agidang tangokba noksa nung angur.

New Delhi, Mongputeni/ October 17 (Agencies): Brihostibarnü Panchkula nung Nayab Singh Saini-i tang agi tanabenbuba Haryana nung chief minister inyaktüsü asoshi tenangzükba agiogo.

Iba sentong nungji Ato kilonser Narendra Modi densema BJP lenirtem aika liasü.

Saini-i Hindi oshi nung chief minister tenangzükba agi.

Kasa sentong nung Ambala Cantt nungi MLA Anil Vij, Israna nungi MLA Krishan Lal Panwar, Badshahpur menden nungi MLA Rao Narbir Singh,

Tosham MLA Shruti Chaudhary, Ateli MLA Arti Singh Rao aser Radaur MLA Shyam Singh Rana nungeri minister tenangzükba agi.

Haryana Angh, Bandar Dattatreya-i ketdangsüa parnok nem tenangzükba agidaktüsü.

Kasa sentong nung Uttar Pradesh, Assam, Meghalaya aser Andhra Pradesh nungi chief minister tem, BJP National Tir J P Nadda aser Union ministers- Rajnath Singh aser Amit Shah nunger aden.

Brihostibarnep Nayab Singh Saini-i Valmiki Bhawan

gurdwara aser Mansa Devi tekülem ki semdanga sarasadem agia liasü.

Osangbenertem den jembidang Saini-i, Ato kilonser Modi lenisüba kübok sorkar tasenbai Haryana tejakleni anir aotsü nükjidong lir, ta metetdaktüsü.

Paisa, sorkari election mapang tenangzükba balala ataloktsütsü, ta metetdaktüsü.

Tawa Haryana assembly election nung BJP-i menden 90 nungi menden 48 tashi nung takok ngua liasü. Iba sülen MLA temi Saini BJP legislature party lenir shim.

Kanga sensak tia nung alirtem teimba aliba linükji India lir: UN

New Delhi, Mongputeni/ October 17 (Agencies): Alima nung kanga sensak tia nung alir nisung billion 1.1 lir aser iba nungjagi sensaker teimtiba aliba linükji India lir; iba sülen tanabuba jenjang nung Pakistan linük lir, ta Brihostibarnü sayaba UN indang Global Multidimensional Poverty Index 2024 ajanga metetdaktüsü.

“Kanga sensak tia nung alirtem teimtiba aliba linük ponguji India (kanga sensaker million 234 lir), Pakistan (93 million), Ethiopia (86 million), Nigeria (74 million) aser Democratic Republic of Congo (66 million) linüktem lir. Alima nung kanga sensaker billion 1.1 nungi tesadang shibo (shilem 48.1) item linük pongu nung lir,” ta kasa osang ajanga metetdaktüsü.

“Alima nung arrshi küm 18 ser tekübokpur million 584 shi kanga sensak tia nung lir, aser ibaji alima nung tanur shilem 27.9 asütsü. Iba denji medemdangra taintem shilem 13.5 kanga sensak tia nung lir,” ta kasa report ajanga metetdaktüsü.

Alima nung kanga sensaker shilem 83.2 bo Sub-Saharan Africa aser South Asia nung alirtem lir, ta Global Multidimensional Poverty Index 2024 report nung shia lir.

World War II sülen rara teimtiba aliba kümji 2023 liasü aser item rara ajanga nisung million 117-i pei ki toktsür tesem balala nung prokshi.

Alima nung kanga sensak tia nung alir nisung billion 1.1 nungjagi shilem 40 jungnüabo (million 455) rara aliba linüktem nung lir. Iba nungji tang teraradak tesemtem nung alir

sensaker million 218 lir, rara agi kongshiba tesemtem nung alir sensaker million 335 aser yimjung maliba tesemtem nung alir sensaker million 375 lir.

“Gaza nung rara ajanga nütsüng shilem 83 bo linük telung nung tesem balala nung prokshia lir,” ta report ajangasa metetdaktüsü.

2010 küm nungi tenzüka UNDP aser OPHI nati küm shia Multidimensional Poverty Index sangdonga arudar. Parnoki nütsüng billion 6.3 aliba linük 112 nungi osang balala bendena iba report renemba sülen sangdonger.

Multidimensional Poverty Index ya kiojen peria maliba, merükmejuba, electricity, sorochockba totzü, chiyungtsü tajung aser school attendance lenlatem nung ajemdaker asadanger.



Taküm August ita nung Kolkata nung aliba sorkar hospital ka nung doctor tetsür ka tashiyim amshia raksatsür tepsetba anema October 17, 2024 nü New Delhi nung kaketshir tentet balala nungi z ü n g s e m t e m i longkak aitba noksa nung angur.

Finance Minister Sitharaman-i Mexico aser US semdangtsü apuso

New Delhi, Mongputeni/ October 17 (Agencies): Union Finance Minister, Nirmala Sitharaman-i Mexico aser USA na semdangtsü atema Brihostibarnü Delhi nungi apusoa ao.

Kasa anogo nung la Guadalajara Airport (Miguel Hidalgo y Costilla International Airport (GDL), tonga aoba mapang nung India ambassador to Mexico, Pankaj Sharma-i la agizüka liasü.

Finance Minister Sitharaman-i October 17 nungi October 20 tashi Mexico semdangba mapang nung India aser Mexico na tsüngda shishilembaba, investment aser technology tsütsü tesendaktep tashi itshitsü atema jembitsü.

Lai Guadalajara aser Mexico City nung yimtenren lenirtem aser business lenirtem ajurutsü.

Ministry of finance-i Sitharaman-i Mexico semdangba noksa lemsatapa X ajanga, “Union Finance Minister-i sector balala nung yimtenren lenirtem aser business lenirtem ajurutsü aser #shishilembaba, #investment, #technology, #innovation, aser #DPI nung amalitep jenjang tajungba akümtsü atema lenmang bushitsü aser #IndiaMexico tsüngda tesendaktep tashi itshitsü atema jembitsü,” ta metetdaktüsü.

Guadalajara nung lai Global Sovereign Debt Roundtable nung shilem agitsü aser Coalition for Disaster Resilient

Infrastructure aser Centre for Strategic and International Studies-i ayongzükba o lemtepbba nung shilem agitsü.

Laisa Mexico nung India nunger IT Firm, Tata Consultancy Services (TCS) headquarters semdangtsü aser Mexico Finance Minister, Rogelio Ramirez de la O den senden amentsü.

Mexico City nung lai India-Mexico Trade & Investment Summit nung okila jembitsü. Tesüsa lai Mexico nung aliba India nungertemi ayongzükba sentong nung adentsü.

October 20 nungi October 26 tashi Sitharaman-i United States semdangtsü, iba mapang nungji lai G20 finance ministers, central bank governors, environment ministers aser foreign ministers senden nung adentsü. La G7-Africa ministerial senden nunga adentsü.

New York City aser Washington D.C nung Sitharaman-i Pension Funds Roundtable senden nung adentsü aser Wharton School aser Columbia University nung tesayurtem aser kaketshirtem den jembitsü. Lai World Bank, Asian Development Bank, European Bank for Reconstruction & Development aser financial institutions nungi tongti lenirtem den-a senden amentsü.

Laisa UK, Switzerland aser Germany nungi lenirtem ajurutsü.

Bihar nung yi nung miim jemsema nisung 25 asü; nisung 12 puogo



October 17, 2024 nü Bihar kübok Siwan district nung tebur ka yi nung miim jemsema sülen hospital-i anir aodang tangokba noksa nung angur. Bihar nung yi tamajung ajemba ajanga nisung 25 asü aika hospital nung mongdar.

Patna, October 17 (Agencies): 2016 küm Bihar nung yi nokdang, ajisüaka state nung ‘hooch’ ta ajaba yi nung miim jemsema mapang shia nisung aika asür; ajioda tang-a Bihar kübok Siwan aser Saran district na nung yi nung miim jemsema nisung 25 süogo.

Brihostibarnü Director General of Police, Alok Raj-i, Siwan district nung nisung 20 asü aser Saran district nunga nisung 5 süogo, ta metetdaktüsü.

Yi tamajung ayokba atema tang tashi nung nisung 12 süogo, aser parnok anema court nung ken o angadanga sülen temerenshi agütsütsü, ta paisa metetdaktüsü.

“Iba tatalokba bushisüngdangtsü atema bushisüngdangba team ana tentetogo. Local level nung team kati iba tatalokba bushisüngdangtsü aser kasa tatalokba bushisüngdangtsü atema Patna nung Department

of Prohibition-ia SIT ka tentetogo aser parnoki tawa tatalokbatem ajak bushisüngdangtsü, iba sülen telemteba agitsü,” ta DGP-i metetdaktüsü.

Ketdangsertemi ashiba agi, yi tamajungba ajemba sülen nisung 20 dak tema hospital nung mongdar, aser parnok teimbaka tenük pokogo.

Bihar State Prohibition Minister, Ratnesh Sada-i, state nung yi tamajung ayokba azüoktsü atema ozüng tesashi “CCA” (crime control act) benoktsü, ta metetdaktüsü.

Sorkar ajia State Congress Tir, Akhilesh Prasad Singh-i, “Kechiba CCA dang benoktsü? Aibelenertemji alenseta südaksütsüla. Shinga danga tai matoktsüla,” ta ashi.

“State sorkari yi nokdangba ozüng reprangshitsü nungdaker, kechiyong ibaji ajanga yi tamajung ayokba menokdangteter,” ta paisa metetdaktüsü.



TIR YIMYIM YIMOBILEM (EDITORIAL)

DIMAPUR ROGONÜ, OCTOBER (MONGPUTENI) 18, 2024

Khen tenzükshitsü asü ?

Nagaland nung inyakyim ajak raksaa lir, anungji government mapa nung asüyonga, arogo mapa nung asüyonga mesüra lokti tentet inyakyimtem nung asüyonga, teinyakdak tejenpurtem asoshibo kecha balaka masütsüa akok saka mapa nung tasen aitertem asoshibo taoksatsüka ataloker aser manidakteter. Aji oda, mapa tasen angu nungji pelasete Tsüngrem nem tenügsang agüja sarasademer mapai aotsü tenzüker. Ajisüaka, mapa inyakdak turlurtemi anir tilartem tashi inyaksangshi nung ochimashiba angudang, tasen aiter lanurtem aikati mapa nungi anennüa bilemer. Aji oda, nübortem asoshi aruba senotsü nungi shilem tulubalenka agizüka office nung inyakertem rongnung tulubaa tuluba yari aser tilartema pei pei yari lemsaa agiba angudang mapa nung tasen aitertemibo temulung agi magizüker. Item ama tim masüba mapa nungi tenzüker inyaka-inyakabo cheque tazüng nung sign ser yoktsüsa akümer. Iba cheque nungji shibai sen kwi zülur agizüka agitsüar memetet. Aji oda, tamalen purtemi mapa shia sübokrem agitsü sobaliba tamajung saka tajung amai ka tentetja lir, anungji tasen purtemi memeshiyonga pa mapang nung pasasa sübokremji arur, anungji magizükli asüyonga majung aser agizükdi asüyonga ochimashi mapa tenzüker asütsü ta mapa nung tasen purtem dak tejen tashidak melamelaa menaloktsüsa ochimashi inyakyim mapa inyakdak tesem aika nung tenteta lir. Ashiko, tanü asüngbo bio-metric inyakyim agi pei pei temeyong nemadakja inyaker asünungji, mapa inyakdak nisung mali ser taila nisungbo inyaka malitsüa akok, ajisüaka tamalenbo mapa inyakdak tesem aika nung turlurtembo pei ita sen dang nungibo taila mapa inyakertem tenüng nung agizükba ita sen teimba anguba otsüa angashia aruogo. Kasaji, kaketrejutem nunga shitakba tesayurbo mali saka ita senbo agizüka agir ta asüba tatalokbatema liasü. Ashiko, tanga bio-metric system aliyonga merükteter memerükjamba tesem aser tenüngtema alitsüa akok. Kasaji arogo nunga tasenpurtembo tanela khuret bener nüktzü yimya tenzüktsü arunung, mapa inyakdak sarasadem mapangbo tenüng agi dang agirbo santem taküm jenjang indang masü anogo piyong sen aser ali kimong indanga otsü atongtepba angudang tasen purtema tsükadoker. Kasaji lokti tentettem nunga lenirtemi tanü asen loktiliba nung nübortem kangshiba aser akoksaba timtembo mereprangteter saka aiben aikati sen angur asü mangur ta asüba tsütsü dang rangloker lokti aniba agi kima yimdong sünga auer ashir poktetdagi aser asen lima kibur mali tuluba nema aser tilaba nema pei sünütsü sädaktsüba lima ka kümogo. Asenok iba amaibo talangka moutettsü ! Auer aser ashir dang kecha meshitetba yimtenji nübortem asoshi kechi sütsü ? Ochimashi aser japujari anema menokdaktetba arogoji asenok asoshi kopiga aotsü ? Nübortem timtemba tia aser nungdak mereprangtetba loktiji asenok asoshi menüngdaker ! Item tensa tia ya kodang bilemdangdir, asenoki tarutsü lanu putu meimra, tang asenok tim masüba inyaksangshi ajak anener, tim agi ochishia nisung shia pei mapa nung inyak tenzüktsüsa asen yimten, arogo aser lokti inyakyim khen tasen kuma tenzükshitsü nungdaker. Tanü asen yimten, arogo aser lokti tajungba kuma melenshitsü asoshi nisung melenba agi majungtsü mesüra lenir melena shimba agia makoktsü saka asenok ajak mulungjang tasen kuma melenshitsüla. Ibayongji, David-ia Tsüngrem dang temerük temulungjang ka meshi aser tanela tasen ka enokjang ta sarasademba Tenügsang ken 51 nung shia angur. Yimsüsür, lenir aser tenzükertemi anir asenok nübortem shia asenok dak aketba memerükba shisatsü aser temulungjang ya merükteter, asenok dak ochishia temeim agi Tsüngrem aser nübortem tenzüknuäba tanela tasen ka ali nung dang, atangji, asenoki aginüba ama asen lima nung asen inyakyim tasen kuma tenzükshitettsü. Idangji dang asenoki ya ozü lima ta Tsüngrem danga aser nisung danga nümadangdanga shitettsü.

OLEMSABANG

Kanga Rongshitar Nee

~ N. Saku Imsong, 4th Mile Diphupar

Temeim asen Aor Senso tajungtem, asenok asoshi molung shiranga bilemba, aser teti temolung rong bilemba iba sapang ajanga oren kar lemsateper. Oda nüburtem alaktsüta bilemba agi oda chidentsür pentsü neme aor ama meyoktepa zülur, meratai züngdaktsünür.

Mezüngbuba nung Tir Yimyim küm 21 ajungba osang angashiadang kanga mulung shiranga pelasete. Kechiba ta süra, atangji wara-a aruogo, saka asenoki oda tazüngertemi tatoktsür indang kangabo shishia mebilemer amai reprangteter. Ahu parnokia online nung asenok meimba agi yok sütiko, saka joko wara süitemer masü na? Anungji asenok tazüngertema mobile nung masü, arungkoto paperji (original hard copy) züngdi koda ta shidanger.

Kechiba ni ya shinür ta süra, asenok ajaki metet iba paper ya tamasa adokdangbo Page 12 keter adok, iba sülen Page 10 aküm, aser ano dangbo Page 8 dang adoker. Oda asenoki shisadanga iba paper ya YIRALOKER masü TEKONGRABA akümer masü no? Iba den süra paper adoktsüjia kodaka shisabulua alitsü ama bilemer, ano paper agirtemia mapang shidak nung bill magütsür, külen online nung azüngertem jagibo Page kwi samar memetet. Hai, oda kokra arungkoto online ya shibanger asen kinbo ajaki ajak yaritepti koda ta shiner ati ya. Tamalen adokba danga paper pezü mesüra pungu tashi samaogoto (Paper balala).

Anungji yamaisa ora Tir Yimyim yaa samatsü menua malia no, ONLINE MASÜ TATOKTSÜRbilema yaritepti arung nee ta ayongzüker.

Tanabuba nung Naga Lima Khrista asoshi dangi meyipti. Aki putu mapang LEPTTEP TSÜNGTEP mapang nung süaka temolung temerük agi süng long külema aru. Saka Tsüngremi asenok apayu nung 1872 küm Khrista osang tajung bener arua asen kin dang tamasa ayu. Anungji iba yimsü nungibo tayang küpzüktsü masü, saka temeim sayutsü, tila akümstsü dang sayu. Anungji Otsüla, Oboula, nunger ajaki iba yimsüji akang akanga amet. Kechi tensa ajurutir ajuruaka parnoki ajak ajangdanga otet. Parnoki iba Tsüngrem temeim osangji Naga kin ajak dang sayunüba agi Naga kin ajak dangi tetsüng tesa agi timtem jenti arema iba osangtajungji sangdonga jajadang tepang agi ashitsü makokba timtem rishikangshi jenti ajuruba otsü asenok ajaki meteta lir.

Aji asü agi Tsüngrem osang tajungji, oda asen kidang aon tajung asoba kiyonger ajak nem chidangdaksünüba agi kiyonger ajak nem agütsüba ama sangdonga oa Naga kin ajak dang iba osang tajung yimsüji sayua jajadang tabayutsü sannüker karbo dangar kin yimmakki oda ni pastor Aor ta ashiyonga parnoki Tsüngrem yimsüji memetetba agi nok agi lepseta toktsür aoba tatalokba otsü lir nee. Oda asen tsürapurtemi yamaji taküm agi tenla tenzük nungji Tsüngremi ajak dak alaka asen Ao kin ajungkettsü meshisadanger no?

Aji sür külen Mongdang nung NAGA LIMA KHRISTA asoshi ta Nagalima ajaki agizüktteta NAGALAND FOR CHRIST ta yimyim agütsür lia British Govt-i Naga nunger ya shilem palaka ta ajitetba agi asenok nem 371(A) ya agütsür oadok. Ali madak parnok kibur ta agütsür ao.

Aji agi INDIAN Govt-i asen Naga nunger dang par ozüng penshitsü arendaker. Saka asen lima Jammu & Kashmir ama kümdaktsütsü, aser Naga nunger ajak limaji parnok ket nung ayutsü tebilemba nung kanga RONGSHIDAR NEE ta asüba nung ni metetba onük kar bener arunür.

1. Tasü mang arongba mitsü bener arua tzü nung enoktsü. Ango rongnung süpen angoba par yimsü agizüktsü suti. Ango rongnung pa sa tesaksakba.
2. Yoka asayatsü ayongzüka amongba ya par tamangba nung shilem ka lir.
3. Raksha bandhan yimya benshiba.
4. INDRA GANDHI stadium Kohima tenüng melentsü asameyangba.
5. HORNBILL Benjong amongnü mebentet, amongnü mebentet amongba benjongmong ka.
6. Amongnü election agitsü ozüng agütsü Vote azüngtsü ashiba anga-a inyakba ama.
7. Nashi tetsü dang tetsü tasola ajatsü ajungmesoba ta shiaka Naga nunger kechi tsübuttsü ali ta bilemer tayimtsü anendak tashi aruba mezüngmeshiba ano aika lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'Tamang katetba Tsüngrem nisung' Rev. T. Likok taküm otsü saya



'Tamang katetba Tsüngrem nisung' Rev. T. Likok taküm otsü sayaba sentong nung kaket zülur Imkongmenla aser la kinüngbo Rev. Dr. Mar Atsongchanger na den Rev. P. Longri Longchar aser Advocate Takoyaba Longkumer nungger tangokba noksa nung angur.

Mokokchung, October 17 (TYO): Tsürabur Rev. T. Likok akumli nung pa nem lezmüksüba Tsüngremer wadang temer Teyanglur dangi meyipa oor küm 25 ajungdang pa indang taküm otsü kaket ka Brihostibarnü Clark Theological College, Aolijen nung sayaogo.

Iba kaket nung pa taküm otsü; Tsüngremer wadang nung tenzüka aruba aser pai ajangshiba otsü; pai zülua toktsüba kaketem indang aser pai jembiba sayutsüngi onüktem kar inoka zülua lir. Iba dak alaka, shilem tongtibang kaji, pa den külemi Tsüngremer wadang nung tenzükertem, pai sayurtem aser medemerterem ajanga Rev. T. Likok indang zülubatem iba kaket nung abensa zülua lir.

Rev. T. Likok Taküm Otsü kaket sayatsür, Advocate Takoyaba Longkumer shiba 1957 küm Rev. T. Likok den külemi Impur Bible School nung tenzü- asangur taküm ana külemi ki ka nung aliba, pai, 'Tamang Katetba Tsüngrem Nisung' kaket sayatsü.

Iba sülen, Rev. P. Longri Longchar, shiba Impur Bible School nung Rev. T. Likok student liasü, Tsüngremer wadang nung aliba tepiyong temulung lemtetba akhang tembar asü aser shibai Rev. T. Likok aser kinüngtsü Repala kibong akümba nung tongti shilem agi, pai Rev. T. Likok Taküm Otsü kaket meshiteta sarasademtsü.

Kaket saya sentong nung Mr. Meren Longkumer, Ex.

Pastor, Ungma Baptist Arogo ajanga Rev. T. Likok aser Repala menungra bilemtetba O jembia liasü. Mr. Meren Longkumer Impur Bible school nung azüngba mapang Rev. Likok den lia azüng aser Tsüngremer wadang inyakba tepiyong Rev. T. Likok aser Repala den akhang tembar lia aru. Tang tashi, Mr. Meren Longkumer, Rev. Likok aser Repalar Jala-jabasotem den tsürabur ama meimtepba arur.

Rev. T. Likok Tsüngrem tenzüka wadang asem nung tenzü. Mezüng Impur Bible School aser ABAM nung tenzü. Iba sülen, CTC nung tenzü aser tatemsa Khiamiungan lima Noklak nung MTBA-i lapokba Bible School nung tenzü.

Tsüngremer wadang ajak nung kanga temulung süa aser bendanga tenzü. Timtem aika ajuruba kulitem liaka, pa asoshi tepelatiba aser jangra tatemtiba tenzüka mapangji yangji liasü ta pai akumlidang ashi... "tambur kümer süaka asen nübür aser kibong ajak toktsür Khiamiungan lima, Indo-Burma nung aliba nübürtem aser arogotem nung tenzüka mapangji jangratatemtiba tenzü" aser iba tepela aser maongka asoshi MTBA dang pelaba lephsia sa jembia. Item ajak bilemteta, iba kaket saya sentong nung Rev. Ponen Longchar, Pastor, MTBA ajanga Mrs. & Rev. T. Likok nungi jakzüka kibongtem asoshi sarasademtsü.

Mr. Wati Longkumer Pastor, Ungma Baptist Arogoi Sarasadema tenzü aser Rev. M. Toshi Jamir, Asso. Pastor, Ungma Baptist Arogoi sarasadema iba sentong tembanga liasü.

Tamang Katetba Tsüngrem Nisung: Rev. T. Likok Taküm Otsü kaket ya Rev. T. Likok jala tasembula Imkongmenla aser kinüngbo Rev. Dr. Mar Atsongchanger, Missionaries, Indonesia, tenati zülü aser TDCC ajanga adoktsü.

Iba kaket sayaba sentong Rev. Likok & Repala jabaso tamposang L. Imsutoshi Jamir, Clark Theological College kidang agia liasü aser jabaso tanabuba T. Apok Jamir, Pastor, Borolingri Ao Baptist Arogo, pai sentep ani.

Impur nung tenzükdang tashi tanur 6 liasü aser Noklak lima tenzüktang jala asembo kibong küma oadoker liasü. Anungji jabaso tambusanger tang telidak kimong ya, Rev. Likok aser Repala jala-jabaso par 8 prongla tsürabur den külemi lia intetdak kimong, aser tang tashi Tsüngremer tesüngmangtsü taochi nung par 8 prongla kibong yangerteta taküm lir. Tsürabur anaprongla taküm meliaka, Rev. T. Likok sür küm 25 ajungdang, jala-jabaso ajak arishia lia, lanuwa aliba mongjen nung iba sentong Tsüngrem tatenba lia agiogo.

Tamang Katetba Tsüngrem Nisung: Rev. T. Likok Taküm Otsü kaket, taküm ABAM küm tatem Inti Mongdang mapang Impur nung angutsü.

ANOGO ABEN TSÜNGREM DEN

Ne Teka Koda Merüka lir ?

T. Ken 18:20- 29

Asenok timtem alibaji kechi ali, asenok teka dang merüka lira, Tsüngremi itemji temoatsü agi süngtsütsü. "Kibubai kü temeshiba yari kü nem sempet agütsütsü"(t. 20). "Anungji Kibubai kü temeshiba yari, Pa nük dang kü teka merükba yari, kü nem meyipa agütsü."(t. 24).

Dawid teka temerük liasü. Pa tsükchirtemi pa indang tiyazü jembia. Parnoki ashi, "Saul, Dawidi ibai ashi," saka pai ibaji kodanga mashi. "Dawidi ne dang ya inyaker", saka pai kodanga aji meinyak. Dawid teka temerük liasü. Kodang asen teka merüka lidir aser Kibuba leman nung lidir, Tsüngremi asenok asoshi inyaksü. Asen nüngdak Pai agütsütsü, kümzüksü aser mapang ajak nung Pai repringtsü.

Asenoki Pa dang langzüba ama Tsüngremi asenok dang langzür. "Taochi akaba nisung dang nai nüsasa taochi sayur; tai makar dang nai nüsasa tai makai sayur. Temerük nisung dang nai nü sasa merüka sayur; aser tekirak nisung dang nai nü sasa kiraka sayur" (t. 25,26). Tsüngrem koda anasa lir asenoki lemtetter. "Pai ni kümzük, kechiaser Pai kü dang pelar"(t.19). Kibubai teka temerük aser temulung temerük tanurtem dang pelar. Tsüngchibaji O sapiji lir. Dawid tsüngchir nisung ka liasü. Saul tekülak nisung liasü. Pa temulung ana atenba nisung liasü, mapang ka nung tetuyuba ana nung repringer. Saka Dawidi pa tenük Kibuba nung ayu.

Asenok teka merüka lira, Tsüngremi takum tia ajak nung asenok repringtsü. Pai asenok tatitangba ajanga anitsü aser Pa tenüng sentsüwangshi asoshi inyaktetdaksür, kodang item ajakji süa odir.

Asenok temeshiba yari Tsüngremi sempet agütsür. Na Kibuba leman nung lir ma ? Yamaji süra nai Pa tawabangba aser tashi nung metaloka alitsü akok. Kodang ne tekatem merüka lidir Kibubai timtem ajak ajanga anitsü.

Khristantem kanga reshikangshiaka Khristan nütsüng kanga renloker

October 17, 2024: 33-36 AD mapang nung Yisu Khrista atema mezüng tepsetba Stephen mapang nungi tenzüka tanü tashi alima tesem balala nung Khristantemi reshikangshi ajangshia arudar, ajisüaka Khristan yimsü shingaia mesamatsütet aser Khristan nütsüng teimba dang akümer, ta International Christian Concern (ICC)-i metetdaksü.

Germany nung aliba melungtet telok International Society for Human Rights (ISHR)-i ashiba agi, alima nung reshikangshi tamajungtiba ajangshiba yimsüji Khristan yimsü lir; 2009 küm alima nung yimsü dak sendakba nung nisung bendangshidanga züngshiba ajanga takoksa angurtem shilem 80 bo Khristantem liasü.

Alima nung kanga nungtugu yimsüji Khristan yimsü lir, ajisüaka alima nung nütsüng shilem asemü nungi shilem kasü dang Khristantem lir.

Yisu Khrista mapang nungi tenzüka Khristan million aika süadokogo.

1899 nungi 1901 küm tashi nung China nung The Boxer Rebellion mapang nung Khristan 20,000 tepseta liasü. 1915 küm aser 1916 küm tsüngda Ottoman yimli nung alir Armenian Khristan 60,000

shis nungi million 1.2 tepseta liasü aser 2000 küm nungi tenzüka tang tashi nung Nigeria nung Khristan 62,000 tepsetogo, ajisüaka alima tesem ajaklen Khristan nütsüng arenba manener, ta ISHR-i metetdaksü.

Khristantem tanü tashi reshikangshiaka Khristantemi pei tamang jenjang manokshir.

Pew Research-i ashiba agi, "2015 küm nungi 2060 küm tashi nung alima nung Khristan nütsüng ano shilem 34 renloksü."

Gordon Conwell Theological Seminary-ia, 2050 küm tashi nung Khristan nütsüng teimba renlokba continent ji Africa asütsü, iba sülen tanabuba jenjang aser tasembuba jenjang nung Asia aser Latin America nunga Khristan nütsüng kanga renloksü, ta metetdaksüogo.

Africa, Asia, Latin America aser Middle East nung Khristantem kanga reshikangshir, tashiyim amshia raksatsür mesüra tepseter, iba denji külemi Khristantem nem mapa maongka magütsür, kibong mesüra loktii sendoker, ajisüaka Khristan nütsüng teimba dang akümer.

Yohan 1:5 nung yamai shia lir, "Tamang nung tesangwa prangshir, aser tamang agi ibaji mekokteter."

**AO OSHI ANGAZÜKDAK:
TANÜ ANGAZÜKTSÜBA OJANG**



Tanüngtalu

(n) oset mesüra chiyongtsü tanüngzük (leftover)

* Ki yangluba tanüngtalu agi ano ak ki yanglu.

Tanüptsü

(adj) shiranga junga akümba (healing)

* Yisu dak tanüptsü tashi aser ain lir.

OLONG PAITEP # 6954

1					2			3
							4	
5		6			7			
8								9
							10	
			11		12			
		13						
14					15			
			16					

TIPIEN

- 1. Ojembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6953 TELANGZÜBA

TIPIEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen,
- 15. Kiochtsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi,
- 8. Lah, 9. Jangkok, 12. Akok,
- 14. Nashi, 16. Sür.

NAI-A YA METETTER MA



Taoba mapang nüngtugu kentenba telok 'One Direction' nungi kentener Liam Payne arishi küm 31buba nung süogo. Pa ya Buenos Aires, Argentina nung CasaSur Palermo Hotel nung sür lia nguteta liasü. Police-i pa asüba ken o jangjashitsüogo aser ashiba agi, "Liam James Payne, ken mejemer aser gitarist, taoba mapang One Direction kentenba telok nung züngsem tanü hotel ka nung tasembuba floor nungi tsüka süogo. Buenos Aires Security Ministry-i ashiba agi, Liam Payne ya pa indang takdang balcony nungi pongoktsüba sülen asü. Payne-i arishi küm 7 jabaso ka toktsür iba lima nungi pilaogo.

Churachandpur nung prangbong aser injang aika ngutetogo



Churachandpur nung prangbong aser injang aika ngutetbatem noksa nung angur.

Imphal, Mongputeni/ October 17 (Agencies): Assam Rifles aser Manipur police na senteper Churachandpur district kübok telungpur tesepe ka meita aoba mapang prangbong 11 aser tanga hadir aser injang balala ngutetogo.

Taoba ghonda 24 tsünga Churachandpur district kübok Canan Veng aser New Lamka tesepe nung telungpurtemi toktsür aliba tesepe meita aoba mapang item prangbong injang aser hadirtem ya nguteta liasü.

Police-i ashiba agi, mezüngbuba Churachandpur kübok Canan Veng yimtsüng

meita aoba mapang sepaitemi prangbong tapu balala 11 nguataeta liasü.

Sepaitemi ngutetba prangbongtem rongnung 12mm barrel Rifles pezü, Mortars (Pumpi Gun) pezü, 12mm Rifle ka, 9mm Pistol ka den magazine aser .303 Rifle ka den magazine densema lir.

Tear gas gun shells ana, 7.62mm injang, 9mm injang aser.303 rifle injang aika ngutetba sülen iba meita aoba sentong ya tembanga liasü.

Iba meita aoba sentong ya ghonda ana shi agi, ajisüaka meita aoba mapang nisungbo ka danga mepui liasü.

Sepaitemi ngutetba

prangbong injang aser hadirtem ya Churachandpur district police nem bendanga agütsüogo aser iba dak sendakba nung maneni ken o bushisüngdangtsü, ta police-isa shisem.

Manipur nung kin ana tsünga mangatettep adoker joko ita aika süia aoer aser tang tashi nung iba mepetmesü nung nisung taküm aika samaogo, ajisüaka tang tashi yimjung asoshi tangatettep ka dangi maruteti nüburtem kanga timtemtepdar.

Mepetmesü tenzüka sülen nisung asüba aser yiruba dang masü state nung kin anaprongla nungi nüburtem aika pei talidak ki toktsür camp balala nung jenoka lir.

Mizoram: C Zodinpuii women commission mendenbula kümogo

Aizawl, Mongputeni/ October 17 (Agencies): Mizoram sorkari taoba mapang State Social Welfare Department joint director C Zodinpuii, state women's commission mendenbula asütsü shimogo.

Lai C Lalchhandami melentsü, shiba opposition Mizo National Front (MNF) aser

kaketshir lokti tentetemi la anema longkak aitba sülen September ita tetenzüklen mapa tokja liasü.

Zodinpuii-i, TATA Institute of Social Sciences, Mumbai nungi social work nung master's degree ka nguogo, koba family and child welfare dak rangloker agiba degree ka lir.

Sorkar tenzüka aliba mapang la state social welfare department kübok mapa balala nung inyakogo aser 2023 küm December 31 nü superannuation nung department joint director ama mapa nungi anena liasü.

La ya Protection of Women from Domestic Violence Act, 2005 indang master trainer ka lir.

Arunachal : Tezu-Guwahati na tsünga tayimtsü tasen ka senzütsü



Guwahati, Mongputeni/ October 17 (Agencies): Tezu, Arunachal Pradesh aser Guwahati, Assam na tsünga hopta ka nung pezüben tayimtsü tasen ka senzüdaktsütsü Alliance Air-i telemteba agiogo.

Arunachal Pradesh Chief Minister Pema Khandu-i ashiba agi, iba inyakyim ajanga iba tesepe nung tesendaktep nung tawa aliba süngdaktsütsü aser rongsenketzüng aser tourism

nung terenlok bener arutsüba dang masü shishilemba balala asoshi maongka talila agütsütsü.

Tayimtsü ya hopta ka nung Hombar, Bodhbar, Hokolbar aser Deobarnü na pezüben senzütsü, ta kasa sangdong ajanga metetdaksü.

Iba den bendenloksema Rupsi Airport-a inyaksangshi tenzüksü aser iba ajanga Guwahati aser Kolkata na hopta nung asemnü (Mongolbar,

Brehostibar aser Honibarnü) sendakteptsü, ta sangdong ajangasa metetdaksü.

Alliance Air-i, UDAN scheme küm iba tayimtsü ya achaayangtsü aser iba ita tatem tashi nungbo tayimtsü ya hopta nung ponguben senzüdaktsütsü atema sentong lir.

Iba tayimtsü ya Arunachal Pradesh aser kidanger state tem tsünga tesendaktep tajungba kümdaktsütsü nükjidong nung benokogo.

US-i B-2 bombers amshia Yemen nung Houthi targets amak

Washington, Mongputeni/Oct. 17 (Agencies): Yemen nung Houthi telok kübok aliba tesem aika nung United States mitkari bomb pokloksü, ta US defence tekolakbai ashi.

US Air Force B-2 stealth bombers temi ali telung nung nok-nü yua aliba tesem pongu nung mezüing-mezüing amak, ta Secretary of Defense Lloyd Austin-i Bodhbarnü ashi.

Region nung Houthis temi civilian aser military vessels amaktsü asoshi amshiba nok-nü yua aliba "hardened" underground facilities nung amak, ta Austin-i ashi.

"Asen tsükchir temi komarka ali aroka tur akang-akanga molubanga liaka United States-i maktetsü tashi lir ta iba yagi sayur," ta pai ashi.

"US Air Force B-2 Spirit long-range stealth bombers mapa ajanga US-i nungdakba mapang tesem mashi nung amaktsü tashi aliba sayur."

Houthis indang Al Masirah TV satellite news channel-ia Yemen yimtiba Sanaa aser Saada temeket nung tayimtsü amshia amakba osang sangdong, koba 2014 kum nungi iba telok

yagi amokbanger lir. Ajisüaka parnoki teraksa mesüra asü-amaba osangbo magütsü.

Taoba kum November ita nungi Iran den sendaktepa aliba Houthis temi Red Sea, Gulf of Aden aser Bab al-Mandeb Strait nung Israel den sendaktepa aliba rong aika amak aser ibai Israel-i Gaza nung raradang nisung 42,000 dak tema tepsetba mapang Palestine nungner bhukuma inyak ta ashir.

Ajisüaka iba telok yagi rara den sendaktepa maliba commercial vessels tema amak.

Israel aser Hezbollah tsüingta rara tesashiba akumdang Houthis-i Israel dang Lenanon amakba anenang ta akhanger.

Taoba ita Houthis-i Israel nungner Tel Aviv aser Ashkelon yimitem aser US navy warships asem dak missiles aser drones amshia amak ta ashir.

Beirut nung Hezbollah lenir Hassan Nasrallah aser Tehran nung Hamas lenir Ismail Haniyeh tesetba sülen telangzüba agüja Iran-i October 1 nü Israel dak missile khaloktsü aser iba sülen Israel-i tayang kepzüksü asameyanga arur.

Houthis temi amakba ajanga

international trade nung maneni timtemtar, ta Austin-i ashi aser alima nung tongtipangtiba tzu lenmang nung US sepaitem kumzüka ayutsü aser par yimya tashi maik kumdaktsütsü mechi Houthis alidak maneni amaktsü totuyuba agütsü.

US Central Command-i sangdong ka nung, parnoki amakba asadanga nung civilian tem asü-amaba mali ta ashi.

Tesüiba mapang Houthis dak B-2 Spirit amshia amakba osang mali.

Nuclear amshitetba B-2 ya 1999 kum Kosovo war nung mezüing amshia liasü aser iba sülen Afghanistan, Iraq aser Libya nung yoka lir. US mitkari rara nung iba tayimtsü ya kangabo mamshir, kechiaser iba tayimtsü ya ka nung sen \$1 billion shi lir.

B-2s ya US indang Missouri state nung aliba Whiteman Air Force Base nungi ayameso ta osang ajanga ashir. Ibai January 2017 sülen combat mission atema mezüingbuba aoba alitsü.

B-2 shia 500-pound (227-kg) GPS-guided munitions 80 densema bombs 20 tonnes abentsü akoker.

January 6 ya temeim anogo ka liasü: Donald Trump



Donald Trump

Washington, Mongputeni/Oct. 17 (Agencies): Taoba US tir aser Republican Party candidate Donald Trump-i January 6, 2021 ya temeim anogo ka liasü aser Capitol nung rongrong adokba mapa kecha matalok, ta ashi.

Bodhbarnü Florida nung town hall sentong ka agidang Republican telok bhukumer kati iba anogo atalokba indang asüing dang pai yamaji langzü.

Longkak aiter meyerijang aika Capitol Building telungi aiba ya pa mechi masü saka parnokia election meshidak agiogo ta bilemba ajanga lir, ta Trump-i ashi. Pai yimjung nung longkak aittsü ayongzük, ta pai nenshia ashi.

"Aibelen mapa kecha meinyak aser mera tesashi agiogo," ta Repunlican presidential candidate-i ashi.

Taoba tiri "armed rioters" ta osang sangdongba aitsü aser "Yangji prangbong kata meliasü, asenok ket nung prangbong meliasü, dangarbo prangbong bena liasü, saka asenok prangbong meliasü," ta pai ashi.

Joe Biden-i 2020 election takok nguogo ta taoba vice president Mike Pence-i kuli

agütsüba Trump-i aitsü. "Pai kechi inyakogo, aji ni khenyongi magizüker," ta pai ashi.

2021 kum January 6 nü Donald Trump bhukumer nisung meyerijang aika US Capitol telungi nungpoka ai.

Iba maparen ajanga 2020 tir election results kulizüing agütsütsü Congress joint session ayongtepa aliba nung meinpronga liasü, kong Trump ya Democratic telok nungi Joe Biden-i tsükdakja liasü.

Iba rongrongshirong dak sendakba nung police ka densema nisung pongu asü.

Longkak aiterem Trump indang nisan amer aser MAGA sübotsü sübor office tem windows aser ki o jen raksatsü aser police den kanga sashia raratepa liasü. Nisung kari yimten yimsüsür anema amokmeren o jembia liasü.

January 6 nü White House kima nungi jembidang Trump-i pa bhukumer tem dang, "Yangi alir ajunga yakta Capitol building bushia yimjung nung aotsü aser linük meimba ola angashidaktsütsü ta amanger," ta shia liasü.

Iba tatalokba asoshi August ita ano Trump anema ken o benoka liasü.

Bangladesh court-i Sheikh Hasina aputsü bushir



Sheikh Hasina

Dhaka, Mongputeni/Oct. 17 (Agencies): Bangladesh nung aliba court kati ita ana jakdang kaketshir temi anir nokdakba ajanga yimten laoba sülen bendang lima nung jenoka aliba taoba ato kilonser Sheikh Hasina aputsü totuyuba agütsü.

Bangladesh indang International Crimes Tribunal (ICT) nung chief prosecutor Mohammad Tajul Islam-i Brehostibarnü ashiba agi, Hasina aser dangar 45 aputsü court ajanga totuyuba agütsü aser November 18 tashinung okadak adentsü metetdaktüsügo.

"July nungi August tsüingta nisung jenti tepsetba aser meimchir anema mapa tamajung inyakba mapang Sheikh Hasina ya yimsüsüba menden nung tekolak liasü," ta kaketshirtem longkak aitba anema nokdaka nisung 1,000 dak tema tepsetba athishia Islam-i ashi.

Kaketshiri aniba movement yagi sorkar dang civil service mapa nung 'war veterans' kinunger nem shilem asem wazükja aliba agienang ta takhangba agüja liasü aser longkak aitba tali tuluba kuma Hasina ato kilonser menden

nungi alutsü akhang.

Ato kilonser-i longkak aiter anema tashi tali amshi ta human rights telok temi ashir, saka lai magizüker.

Hopta aika linük tesem ajungalen rongrongshirong adoka arur Hasina-i ato kilonser menden yutsü aser August ita tetenzükken India-i jena ao. La ya Nobel Peace Prize angur economist Muhammad Yunus-i melen aser tang linük indang interim government pa lenisüba nung lir.

Hasina ya Bangladesh yutsür aoba sülen yimjak nung mongudang. Arishi kum 77 tain Hasina ya tesüsa India yimtiba New Delhi anasa military airbase ka nung liasü.

La India nung aliba ajanga Bangladesh jashi aser Hasina indang diplomatic passport agientsü. Linük ana tsüingta 'bilateral extradition treaty' lir, anungji la ken o jembitsü atema meyipa shilangtsüsa akumtsü akok.

Ajisüaka iba treaty nungya aibelenba ya "political character" asünungbo 'extradition' memulungtsü akok ta shia lir.

Ajisüaka taoba mapang democracy asoshi nokdakla ya

India nung asü dangalen aliar mejangja. Lai kum 15 yimsü asüba mapang yimten tashi timba lai dang amshia liasü.

Pakistan nungi nüchiso angutsü asoshi 1971 kum raraba mapang tashiyim amshiba bushisüingdangtsü atema Hasina'er sorkari 2010 kum ICT ya amenok.

United Nations aser rights groups temi yangji metokmeperi aliba aitsü, kechiaser Hasina-i court ta amshia la den tokteper yimten yimsüsürtem samatsütsü merang.

Hasina-i longkak aiter aika tepsetdaktüsü ta tai tonglokja iba court yagi ken o balala bushisüingdang sütar.

Nisung 1.1 billion kangasa makamait tia nung alir: UN

UN, Mongputeni/Oct. 17 (Agencies): Nisung billion ka dak tema kangasa makamait tia nung alir aser parnok rongnung tesadang ka jungnüa rara ajangshia alidak lir, ta United Nations report tasen ka ajanga ashi.

Rara nung aliba linüktem nung "multidimensional poverty" jenjang temaba lir, aser item linük nung chiyongtsüm electricity, tajemtsü tzu aser sanitation kanga anünger, ta UN Development Programme (UNDP) indang osang Brehostibarnü sayaba nung shia lir.

Linük 112 aser nisung 6.3 billion indang research agiba nung nisung 1.1 billion makamait tia nung lir aser yangji 455 million "shadow of conflict" nung alir, ta Multidimensional Poverty Index ajanga ashir.

"Tesüiba kum ishika tsüingta

rara tesashiba aser timba kuma asü-amar tali akumer, nisung million aika pei aliba tesem yutsür tesem balala nung prokshia lir, anungji takum libaliru nung timtem jenti ajurur," ta UNDP nungi Achim Steiner-i ashi.

Iba report nungya arishi kum 18 tekübok nisung 584 million shi kangasa makamait tia nung lir, koba alima nung aliba tanur shilem 27.9 lir aser nisung tain shilem 13.5 lir.

Rara aliba tesem nung tanur asü-amaba shilem 8 aser rara malidak linük nung shilem 1.1 lir.

Alima nung tesensaktiba nisungtem shilem 83.2 shi sub-Saharan Africa aser South Asia nung alir.

Oxford Poverty and Human Development Initiative (OPHI) den lungjemer bendenba report nungya ki o jen, sanitation, electricity, cooking fuel,

chiyongtsü aser school azünger kanga ajema aliba amala amshi.

Parnoki Afghanistan nung kanga junga shisadanga liasü, kong 2015-16 aser 2022-23 mapang nisung 5.3 million makamait tiai ai. Taoba kum Afghan nungner asem nung ana sensaker ama züingshia liasü.

"Rara agi kongshia aliba linüktem nung tongpang dang nungi nungdakba peritsü ya tasakba lir," ta UNDP nung chief statistician Yanchun Zhang-i ashi.

Kangasa makamait tia nung aliba nüburtem India nung timba liasü, kong nütsüing yongsük 1.4 billion aliba nungi 234 million dak kongshia lir.

Iba sülen Pakistan, Ethiopia, Nigeria aser Democratic Republic of the Congo lir. Sensaker 1.1 billion aliba ya linük pongu ya meyokteper tesadang ka jungnüa lir.

----- MDFA Trophy 2024 osang -----



MDFA Trophy 2024 tananübuba tanabuba asaya DEF Boys aser Moanungsang Memorial Sporting Club tsüngda asayadang tangokba noksa.

Mokokchung, October/Mongputeni 17(TYO): MDFA Trophy 2024 tananübuba mezüng asaya Amokmolu FC aser Telongjem FC tsüngda asaya aser tanabuba nung DEF Boys aser Moanungsang Memorial Sporting Club tsüngda asaya liasü.

Amokmolu aser Telongjem tsüngda mezüngbuba asaya nung asaya tenzüker minute 3 buba nung Telongjem telok nungi J.no 15 Sujimong-i goal-1 idaktsü,iba sülen ano Telongjem telok nungisa J.no 8 Sentimongba-i minute 30 buba nung goal-1 yok aser iba sülen ano minute 42 buba nung J.no 7 Japeth Kath-i goal-1 aser iba s len minute ishika asayar külen anisüngzükba mapang agia liasü. Anisüngzükba mapang agir külen maneni ground-i aita

asayadang minute 65 buba aser minute 86 buba nung Telongjem telok nungi J.no-17 Menguzelie Rutsa-i goal 2 yok, iba sülenji minute asaya tembangtsü anasai arubang mapang minute 88 buba nung Amokmolu Telok nung J.no-8 John Homang-i goal-1 yok aser ano iba sülenjia minute 90+3 nung Telongjem telok nungi J.no-9 Keyipuakleube-ia goal-1 yoka iba asaya Telongjem teloki goal 6-1 agi Amokmolu telok ayong ayonga koka liasü. Iba asaya nung minute Amokmolu telok nungi J.no-4 Maijoy Napen minute 33 buba nung yellow card achi aser telongjem telok nungia J.no-5 Vihoto minute 72 buba nung yellow card chia liasü.

Tanabuba asaya DEF Boys aser Moanungsang Memorial Sporting Club(MMSC) tsüngda

asaya nung DEF Boys telok nungi minute 41 buba nung J.no-11 Hainsiugonba-i goal-1 aser ano DEF Boys telok nungisa minute 47 buba nung J.no-17 Muluwito-I goal-1 yok aser par telok takoklen sür anisüngzükba mapang agir tanaben asayaba ground-i aita asayaba mapang MMSC telok nungi J.no 9 Opangtemjen-i minute 56 aser minute 76 nung goal-2 yok aser ano MMSC telok nungisa J.no-15 Nungsangtoshi-i minute 69 aser minute 75 nung goal-2 yokteta MMSC teloki DEF Boys goal 4-2 agi kokteta liasü.

MDFA Trophy 2024
 18-10-2024 anogo asayatsüpur
 * 12:00 Noon
 - Super Seniors Vs Zonipang SC
 * 2:00 PM
 - Eastern Wing Vs LYM

Kho Kho World Cup mezüngbuba New Delhi nung asayatsü



Sudhanshu Mittal

Mongputeni/October 17, 2024 (Agencies): Kho Kho Federation of India (KKFI)-i, mezüngbuba Kho Kho World Cup koba 2025 küm asayatsü lir, iba atema logo Bodhbarnü Tyagaraj Sports Complex, New Delhi officially sayaogo.

Kho Kho Federation of India (KKFI) aser International Kho Kho Federation nati mezüngbuba Kho Kho World Cup India nung 2025 küm asayatsü ta sangdongogo. Iba asayamung nung continent trok nungi linük 24 nungi team temi shilem agitsü, kong tebur team 16 aser tetsür team 16 alitsü. Asayamung ya 2025 küm

January 13 nungi 19 tashi asayatsü, kong linük balala nungi asayar tajungtibatem shilem agiba angutsü.

Kho Kho Federation of India tir Sudhanshu Mittal-i o jembiba mapang World Cup ayongzuka asayatsü atema India nem maongka agütsüba atema pelaba lemsatepba den iba sobaliba asaya ya tangbo alima ajunga nung asayar ta ashi.

“Tanübo Kho Kho asaya ya linük 54 nung asayar aser 2025 küm tatem tashi nungbo onoki linük 90 ayimjemtsü. Onok linük ajak nung lir,” ta Mittal-i ashi.

Mittal-isa, Kho Kho asaya ya yimti 10 nung school 200

dangi bener oa ajungkettsü KKFI sentong aliba metetdaksü. Paise, iba asaya asayaba kaketshirtem atema membership drive amenoktsü aser World Cup masaya tsüngda asaya lakh 50 bosa züngoksemtsü nükjidong lir, ta ashi.

Kho Kho World Cup ya Indira Gandhi Stadium Complex New Delhi nung 2025 küm January 13 nungi 19 tashi asayatsü.

Tebur asayamung nung shilem agitsü aliba team tem:

Ghana, Kenya, South Africa, Bangladesh, India, Indonesia, Malaysia, Nepal, Pakistan, South Korea, England, Netherlands, USA, Canada, Brazil, Australia.

Tetsür asayamung nung shilem agitsü aliba team tem:

Kenya, South Africa, Uganda, Bhutan, India, Iran, Sri Lanka, Poland, Germany, Peru, Malaysia, Nepal, Pakistan, South Korea, England, New Zealand.

India vs NZ: India team-i mezüngbuba anogo run 46 dang yanglu

Mongputeni/October 17, 2024 (Agencies): New Zealand den Brehostibarnü Bengaluru nung mezüngbuba Test asayaba mapang India team-i run 46 dang yanglu asayar ajak out süa liasü, koba kidang asayaba mapang run tajemtiba yangluba aser ajak sentper run ishitiba yangluba rongnung tasembuba asütsü.

Mezüngbuba Test nung tanünübuba M Chinnaswamy Stadium, Bengaluru nung mimlai lia captain Rohit Sharma-i mezüngbuba batting amentsü shimba sülen India nung asayartemi junga masayatet aser Virat Kohli densema India nung batmen pongui run ka danga meyangluteti liasü.

Bodhbarnü mezüngbuba anogo asaya ya tzünglu aruba ajanga masayateti liasü.

Brehostibarnü India nung innings ya over 31.2 dang asaya liasü. New Zealand team asoshi Matt Hentry-i run 15 agütsür wicket 5 agi aser lanur asayar William ORourke-i run 22 agütsür wicket 4 agia liasü.

India nung asayartem rongnungi Rishabh Pant-i run 20

yanglua pai ajak dang run timtiba yanglu. Kasa mapang nung opener Yashasvi Jaiswal-i (13) dang run 10 dak tema yanglua liasü.

Asaya nung Kohli, Sarfaraz Khan, KL Rahul, Ravindra Jadeja aser Ravichandran Ashwin nungeri run ka danga meyangluteti out süa liasü.

India-i Test nung run ishitiba yangluba (overall)

36 - vs Australia, December 2020, Adelaide

42 - vs England, June 1974, Lord's

*46 - vs New Zealand, October 2024, Bengaluru

58 - vs Australia, November 1947, Brisbane

58 - vs England, July 1952, Manchester

India nung asayaba mapang run ishitiba yangluba:

*46 - vs New Zealand, October 2024, Bengaluru

75 - vs West Indies, November 1987, Delhi

76 - vs South Africa, April 2008, Ahmedabad

83 - vs England, January 1977, Chennai

83 - vs New Zealand, October 1999, Mohali.

ISSF World Cup: Vivaan-i silver & Anant-i bronze medal angu



Mongputeni/October 17, 2024 (Agencies): ISSF World Cup Final nung Brehostibarnü tebur trap event nung Vivaan Kapoor-i silver medal angu aser külem India nung asayar Anant Jeet Singh Naruka-i tebur skeet tetoktepba nung bronze medal nguogo.

Tanü medal ana anguba densema India nung asayartemi iba asayamung nung tang tashi nung medal pezü nguogo.

Final asaya nung Vivaan-i point 44 ngua pa China nung gold medal anguba asayar Ying Qi sülen tanabuba jenjang nung tembanga liasü. Kasa asaya nung Turkey nung asayar Tolga N Tuncer-i point 35 ngua bronze medal nguogo.

Qualification round nung Vivaan-i point 125 angutsü aliba nungi point 120 ngua final-i ia liasü.

Brehostibarnüsa Rajasthan nungi arishi küm 26 tain Naruka-i, final nung point 43 ngua pa tasembuba jenjang nung tembanga liasü.

Iba asaya nung Italy nung asayar Tamaro Cassandro aser Gabriele Rossetti nati point 57 aser 56 ngua gold aser silver medal ngua liasü.

Qualification round nung Naruka-i point 125 angutsü aliba nungi 121 ngua final-i ia liasü.

Iba asayamung nung Sonam Maskar-i, Mongolbarnü tetsür 10m air rifle nung silver angu aser Akhil Sheoran-i Bodhbarnü tebur 50m rifle 3 positions nung bronze medal ngua liasü.

Paris Olympics nung bronze medal atema China den asaya makokba sülen skeet mixed team event nung Naruka aser Maheshwari Chauhan na pezübuba nung tembanga liasü.

BILEMDANGANG
 "Mapa ka tenzüker nung dang tembangtetsü."